

王文簡公文集

王文簡公文集目

卷一

太上皇帝紀元周甲授受禮成恭紀頌十八章

護序

皇帝五旬萬壽恭紀寰海呼嵩頌九章

護序

聖駕臨幸翰林院禮成恭紀演連珠三十首

聖駕臨幸翰林院禮成恭紀 聖孝符經論一首

聖駕巡幸淀津 閱視河隄各工恭賦

護序

恭進 起居注册前序

恭進 起居注册後序

舊刻無

卷二

授左庶子謝

恩摺

同上

授翰林院侍講學士謝

恩摺

同上

授翰林院侍讀學士謝 恩摺 同上

賜御製學政箴謝 恩摺 同上

升授都察院左副都御史謝 恩摺

署刑部左侍郎謝 恩摺 舊別無

署戶部左侍郎謝 恩摺

授工部尚書謝 恩摺

署戶部尚書謝 恩摺

賜朝馬謝 恩摺

實錄告成謝 恩摺

恭辦 萬年吉地議敘謝 恩摺

奏請扣廉完繳永定河分賠銀兩摺 舊別無

奏報考試情形摺 同上

進呈論說摺

同上

各部院題缺主事請仍舊揀選摺

同上

遵旨會議覆奏摺

同上

官員爲生祖母治喪請復舊例摺

同上

請設廠收買蝗蝻摺

同上

請禁漕米陋規摺

同上

重刊字典請旨摺

進呈重刊字典摺

卷三

闡訓化愚論

見利思害說

經義述聞序

春秋名字解詁序

舊刻無

太歲考序

同上

經傳釋詞序

經籍纂詁序

釋名定本序

蕭山王晚聞先生文集序

舊刻無

李復園文序

貴州鄉試錄序

舊刻無

浙江鄉試錄序

同上

又

同上

中州試牘序

同上

王南陔中丞困學說文圖跋

同上

翁覃谿閣學手札跋

同上

卷四

與焦理堂先生書

與王晚馨中丞書

三 舊刻無

與夏遂園書

致宋小城書

與陳碩甫書

九

太子太師兵部尚書閩浙總督金匱孫文靖公神道碑銘

詹事府少詹事錢先生神道碑銘

舊刻無

誥贈通議大夫福建按察使蕭山縣學生綸宣王公神道碑

同上

協辦大學士鄒公墓誌銘

同上

誥封通議大夫吳君暨梁夫人墓誌銘

同上

贈中憲大夫趙公暨賈孫二恭人墓誌銘

同上

臧禮堂小傳

同上

族孫婦江氏傳

汪容夫先生行狀

舊刻無

倪教授行狀

同上

高郵湖西王氏先塋記

同上

壽朱母范恭人五十序

祭劉信芳冢宰文

### 附錄

廷對策

君子所其無逸論

謝太傳出處事業論

擬潘岳籍田賦

帝京賦

舊刻無

應天以實不以文賦

同上

龍見而雩賦

王言如絲賦

試帖六首

舊刻文集尙有己卯會試策問辛巳浙江鄉試策問乾隆乙卯恩科鄉試對策五道嘉慶丙辰會試對策五道爾雅說文釋鹽筴考凡六篇以或係代作或係場屋不經意之文故此刻悉行刪去其可確信爲公作者則編入附錄云



王文簡公文集卷一

上虞 羅 振玉 校錄

太上皇帝紀元周甲授受禮成恭紀頌十八章

雜序

臣聞三五代興氏號伊始義農之前曠哉藐乎世蔑得而云焉厥有傳者上罔微于唐虞下莫茂于成周故庸命巽位而堯道成世德作求而周運昌詩書攸載卓乎稱首蓋言聖人創業垂統爲萬世規繼起之聖人孝思維則而褒大其功也欽維乾隆六十有一年月正元日 太上皇帝歸政 皇帝祗承 聖聖相繼千古極盛 臣謹案六十一年者生生不已之數也周天三百六十度黃道循之而爲三百有六旬蓋由六十之數而以六六互乘乃得三百六十是故六十秒爲一分六十分爲一度六十度者積算之常也六十一度者環生

之始也其在大易曰凡三百有六十當期之日斯則以六位  
成之以一畫開之故積二篇之策而爲萬有一千五百二十  
用是仰見 太上皇帝周甲紀元亦由六十一年積而至于  
億萬年此自然之理也 臣謹案 紀元再值丙辰丙者炳也  
炳然而著明辰者伸也伸舒而暢達其月躔在寅寅于十二  
次爲析木是在箕斗之間有 壽于箕翼之象吉月令辰咸  
彰 仁聖之德表 授 受之期卓煌煌剖神符而合靈  
契不亦懿與 臣聞召誥曰用供王能祈天永命詩曰昭事上  
帝聿懷多福何者天人之應合一之符也 太上皇帝專  
神明之虔恪奉燔瘞于 郊宮而 昊天降庥 后土錫祉  
宜矣矧惟 列聖相承重熙累洽百有餘年 大聖人祇適

德言光昭

前烈上繩

祖武下啓孫謀

五代一堂古

今未見大雅曰其類維何室家之壺小雅曰子子孫孫勿替  
引之類也者不忝前哲之謂也壺也者垂裕後昆之謂也引  
之也者繼序不忘之謂也臣又聞周頌曰維天之命於穆不  
已文王之德之純尙書無逸道文王之德曰自朝至于日中  
昃不遑暇食然猶未及 太上皇帝躬理庶政法 天行健  
焉臣又聞嘉樂之詩曰宜民宜人受祿于天 太上皇帝親  
覽庶獄 恩詔減等有罪疑惟輕之仁焉 貴農重穀 咨  
訪雨暘有勤恤民隱之惠焉 免漕散賑 普蠲正供則損  
上益下民說無疆之義也 發帑治河安瀾奏績則濬畎距  
川萬邦作乂之功也于斯時也萬姓咸悅曰都 聖帝之德  
亶其禕而臣又聞大戴禮曰帝堯南撫交趾北發渠搜東西  
至日所出入淮南子言大禹使大章步東極至于西極豎亥

步南極至于北極然而九州之外罕隸版圖豈如 太上皇  
帝奮武開疆戡暴柔遠蕩伊犁平回部收金川日月所照罔  
不率俾嚮風慕義入貢 壽寓者以億計述職之事既行巡  
狩之典亦著于是 太上皇帝法 聖祖六巡江浙以省方  
觀民設教禮也猗與偉與 盛德懋昭 休烈浹洽然猶  
日就月將 右文稽古 涖經筵 幸辟雍 欽定石經以  
惠儒林 御製詩五萬餘篇 文千餘篇以彰 睿藻炳炳  
麟麟亶亶如也然後 闢門籲俊八開 恩榜再舉 制科  
養老引年千叟來同百禮既至郁郁乎文哉 帝者之上  
儀誥誓所不及矣夫 虔祀 上帝展敬也 迪惟 前光  
崇孝也 五代一堂篤慶也 一日萬幾敏政也 監于祥  
刑好生也 念茲農功務本也 賜租發粟廣澤也 導水

築防弭害也 幅員既長武烈也 時邁其邦文德也 經  
筵宣講闡道也 法駕臨雍敷教也 欽定石經書契作也  
御製詩文謨誥章也 恩科取士旁求俊乂也 詔宴羣  
叟 仁壽同躋也斯蓋 太上皇帝大聖大仁允文允武  
皇帝是彝是訓不愆不忘 壽宇無疆 重離繼照舒 茂  
德振 鴻名揚緝熙流懿鑠唯唯皇皇乎 祓禋禋祔永秉  
引延厥有不可辭讓云爾 世受 隆恩忝邀 慈眷獲睹  
帝堯雲日之光際 重華垂裳之治竊以爲天保之詩尊  
崇福祿臣子歸美其上而作也用敢正列其義祓飾厥文拜  
手稽首而獻頌曰

蕩蕩 聖德昭明有融唯 天爲大唯 聖比隆誕開 景  
運允執其中式敷 文治永詰 武功 申命用休何 天

之龍介以繁祉 五福來降 紀元復始甲子攸同禮崇  
授 受萬禩延洪

皇矣 上帝監觀四方 聖人禋薦穆穆煌煌侯燔侯瘞以  
祀以享禮孔熯矣不顯其光 帝謂 聖人純嘏爾常予嘉  
明德曰督不忘施于孫子受 命溥將 眉壽萬年永世  
克昌

鬱彼長白峻極于天篤生 列祖齊聖廣淵有典有則無黨  
無偏於赫 聖皇佛時仔肩曰 祖有訓 重光載宣聿修  
厥德追孝于 前聿繼厥服其永無愆以似以續億萬斯年  
緜緜瓜瓞在河之渚 本支百世 詒厥孫子吉夢維何麟  
定麟趾太人迺占保世藩滋維曾伊元 聖皇是嗣覃及雲  
仍自今以始昭哉來許緹緹繼起 萬壽無疆永言保之

於穆 大聖朝夕恪勤不懈于 位眎勉孟敦夜如何其  
廷燎有暉嗟爾臣工俾奏俾 聞允矣 天子詢于四門庶  
績咸熙六府孔殷乃 聖乃 神乃 武乃 文 所其無  
逸爲天下 君

惟 帝清問聿求厥寧 明德慎罰直哉惟清 謂茲赤子  
式俾並生若古有訓刑期無刑與罰不辜寧失不經乃 宥  
乃 赦旣寬且平民用不犯罔質厥成日用飲食 平章百  
姓動之斯和祗德惟馨

帝命田峻介我稷黍曰雨曰暘 來咨來茹八徵 耄念五  
位時序習習和風祁祁甘雨鋤彼甫田十千歲取如膏如脂  
我農之士如茨如京我農之庾萬邦屢豐式歌且舞  
乃 召司農欽哉民食 惠此羣黎以綏四國爰逮之粟民

無菜色發倉斯千發廩斯億亦有 普蠲既飽以德出舞于  
田入謳于邑稱彼兕觥祝以 百福 弗祿其康永永無極  
帝咨下土河水滂沛疇其奠之有能俾乂寧彼長菱沈玉以  
祭神則有靈乃謚乃契式 單厥心疏川導滯止水以防清  
黃攸會克豫既宅淮徐其藝于胥樂兮彌萬萬歲

桓桓 王師我伐用張取彼凶殘式闢四方如虎斯虓如鷹  
斯揚如火烈烈斯炎崑岡伊犁既殄回部既僵蕩蕩金川爲  
我封疆薄言震之莫不來享有嚴 天子土宇版章

有崧者岱柴望承 庥有秉者江爰企 懷柔 聖人泣止  
匪紹匪遊扶杖之老瞻拜 冕旒匍服之兒亦迓 旌旂粟  
帛是賚既渥既優 省耕伊春 省歛伊秋於皇 巡狩允  
邁虞周



勉勉 聖皇學有緝熙古訓是式 濬哲維思爰 御經筵  
念茲在茲昔我 聖祖訓典攸鑒 四經既纂微義畢該  
亦越 聖皇藏往知來 欽定三禮咸與析疑釋經以經昭  
列 訓辭

於樂辟雍羣英萃止其圓如璧其流如海 聖人視學譽髦  
斯士 虔祀先師是用釋菜大昕鼓徵有衆咸侍乃 闡聖  
經厥緒攸理 教思無窮 言提其耳昭若發矇賢才蔚起  
大哉六藝惟聖所作振古以還文多紛錯 帝命參稽罔有  
不若攘之剔之其芟其柞檢之校之其探其索展之錄之其  
波其磔鐫之泐之其碑其石 御論宣昭孔懿且碩

倬彼雲漢爲章于天 聖皇眉壽 文思不新粵若庖羲其  
德孔神始畫八卦利用前民稽古堯舜二典攸陳喜起作歌

用答臣鄰洪惟 御製遠邁古人炳如日月巍煥璘彰

思皇多士多士孔嘉敦詩說禮莫不令儀夙夜強學如石之  
磋砥礪文章如玉之磨雍容掄揚吐氣含和 臨軒策命

恩展甲科有德有造髦士攸宜英才 樂育雅咏菁莪

幡幡國老式燕且毛濟濟耆英鳩杖以朝言有旨酒又有嘉

穀對揚 天寵 恩比覆燾稽首進祝載歌且謠 如月之

望如日之昭如柏之茂如松之喬如川之方至如南山之高

天子大孝朝夕 寢門以天下養敬承 至尊克紹克類令

德升 聞 溫恭允塞 家法維遵 光被四表協于 放

勳 基命宥密 夙夜祗勤 光華復旦 德合乾坤惟頌

萬萬年無疆之壽惟 一人元良允爲 有道之君

皇上五旬萬壽恭紀寰海呼嵩頌九章

續序

歲紀祝犁月臨吉亥恭遇我 皇上五旬萬壽昌期薄海臣  
庶四裔君長忻愉盎溢思効祝 釐之誠 上仰承 昊眷  
俯答輿情布令推恩罔弗周徧上儀赫濯侯其禕而臣銜  
命中州弗獲 丹陛趨承附 天衢跼拜之末竊願有所譔  
述用以宣 上德而抒下情伏案中州之望實惟嵩高稟靈  
泰清作鎮坤軸王者確功考德奏玉醴珪珍味雕氛熏今麗  
遠泊乎漢代登牒升文天慶順成山呼呈瑞煜煜乎垂恩儲  
祉吐金景而歆浮雲蓋感格之理煥然昭灼若斯臣駢征所  
歷三華二室神光徘徊敬念修德錫符之理推原 延洪曼  
羨之基不揣卑陋祗竭愚忱謹比事屬辭爲寰海呼嵩頌九  
章拜手稽首以 獻

於赫 昊綽眷佑有德儲祥錫慶靡愆靡忒因氤氲象載

昭悉鼓桴斯應如左券執我 皇奉若虔鞏翼翼曰明日旦  
誠萃志壹勿謂質闇芒芟軋勿謂虛霽積氣呼吸歲三  
大祀懋典云睚 珠亡 紺殿墻列南北爲 祈爲 雩馨  
香芬苾 皇曰欽哉事 天以實圭玉躬親 齋宮淵默前  
旒黈纁夙夜宥密垂精金心表範玉式靈歆優愜崇儀胖飾  
紫壇九叩寅承齋慄通誠祝禱移晷始畢 聖與 天契  
天聽可卽欽崇宗祈樵蒸歆飮璧氣晨煬牢芬夕溢八觚  
四陛規重矩襲曰毋不敬惟 皇帝飭外此羣祀若蠶若嗇  
星辰六子夕月朝日水旱禋禴山岳望秩咸肅獻享靡有闕  
失亨禱告虔嘉生逢吉嵩呼介 壽珠連緯汁 皇帝受祉  
乾乾抱一

列祖垂統以昌以熾 顯謨 承烈四表桃被 純皇纘緒

徽美世濟紀元六十燾覆 天配 皇帝繩 武兢兢抑畏  
萬幾百度 祖訓是佩 五朝典謨增繕明備作山詩譜陳  
常史記炳若星陳煥如霞蔚金枝郊寶弈煜瑰麗 純皇寶  
訓虔恭纂次執競武德緝熙文思由庚道邇周甲歲計皇皇  
番番丹文綠字 帝乃肅然敬承 先志晨興恭讀善述善  
繼執玉齊遯循環一再如羹牆見如寢門侍乙丑之秋 盛  
京言莅鳳旗雲颺鸞和風細 三陵葱鬱蟠天際地 闕宮  
寢殿肸蠭嘉氣在原陟嶽髣髴 遺制昔也皇過雷雨草昧  
今也 弓劍河山環衛 几筵瞻念忱惕心意思艱求莫  
孝思不匱祥和斯感珍貺荐至嵩呼介 壽理合符契 令  
德景福參帝典二二

皇仁育物如春氣含煦嘔不冒下矩上圓丙辰 龍飛 仁

綸普頒租賦蠲免東西朔南芸生欣欣飫若薺甘遇小旱澇  
恩輒下覃吁咈辰告布獲丁男孚甲風拆勾萌雨酣粵歲  
辛酉洪波漫漄茲惟偏災乃戚 聖顏曰我赤子其何以堪  
得無蕩析惇惇痼瘵 手詔責躬心憂如惓星使招集輶車  
趨趯授衣施粥百鎰千鍰黍谷和風不春而還漕糧轉運民  
力實艱或有陋規遺薰一坭 申諭裁革譬稂莠刪毋令胥  
吏恣其狼貪秋官刑典職在詰姦勿縱勿枉毫釐詳參 闔  
澤滂沛一可否間蚩氓冤抑輒扣九關越訴誠罪尙矜愚頑  
破格申理雨露曷慳於廓靈海百川具涵 惠浸萬類賚及  
九寰嵩呼介 壽福基可探 純嘏悠久兼天地三三

周書無逸惟元聖誨我 皇臨御齋心劬毖宵衣旰食兢業  
天位粵自夙興以迄嚮晦懸旌待曙投籤覺寐 御門聽

政 綸言宣示九垓八埏如 殿廷在臣工 召見量材超  
實上自卿尹下及羣吏大棟小桷詳悉品第庶官奉職或曠  
厥事勿耽宴安日就怠棄 嚴諭督責反覆戒勵罔有臯瑁  
因循玩愒懲彼駑駘獎茲勞勩 皇綱獨攬首除大憝太阿  
赫然有北投畀嚴霜肅秋天星墮彗雲霾蕩滌日月澄霽  
聖衷虛受芻蕘下逮門閭聰達猶懼壅蔽奏牘甫上卽 賜  
引對廷撞何益 曰爾獻替管闕何補 曰爾讜議直省積  
案動輒踰歲 詔令清釐毋得淹滯罷占索貫一空罔繫  
天庾積粟民食攸寄七省轉輸億斛儲積弊滋鼠偷粒惜狼  
戾調陳劑新六府允治依然稷 奏墉櫛崇比立我蒸民萬  
邦作乂嵩呼介 壽太平爲瑞歌 功陳詩風雅頌四  
皇猷赫業允文允武 威棱所暨天規地矩如何小醜遊鱗

在釜蜂蠆毒螫川秦豫楚來往飄瞥靡有定所 帝赫斯怒  
選將授琥彤戈鐵甲蜺旌月羽陣肅鵠鶴士勁貔虎軍令再  
申檄草旁午功告三捷氣作一鼓蟲沙四飛風鶴驚語穴空  
蛾伏巢焚燕處九天掣電八荒飛雨其餘勝略寶邲叛旅宿  
州莠民陝右新伍或一戰克或三箭取或醜類殲若掘雀鼠  
或受降築恩信招撫風清賣劍花迎負弩重洋沴蠻恃其險  
阻南閩東粵鳴張螭聚 天戈下指恬波海嶼烟消鯨窟犀  
駭牛渚蠹彼外夷偶弄螳斧霜鋒未血妖氣震沮候尉榆塞  
亭障銅柱彈丸諸國世我肱股天窮月竊人占雲呂航瀛梯  
嶂八紘卽敍鸚歌鳥言布賓饗蒟譯鞮寄象以千百數嚶嚶  
武烈震響區寓耆定既奏清晏多祐嵩呼介 壽雍容羽

舞奉觴萬國

鴻業咸五

五



河流浩浩日月沐浴邈迤星海騰蹕地軸其次清口渺漫淮  
濱易涑漉沽激浪湍洑洪波巨浸提綱列目亞斯諸水支派  
連屬合南北東如鼎三足 帝心用軫顧念比屋要令孟安  
以亭以育衡樓之塞功藏迅速高堰之遏節宣堵築 睿謨  
周悉粲若列燭疏盈瀉溢攀菱沈玉桃花瓜蔓若帶就束金  
隄石牖若軌順轂馮夷安恬支祈弭伏河督增置屹然藩牧  
巨防重鎮高牙大纛南河海口淤沙山簇 諭使濬治毋任  
渟蓄嵒呀天門翕受百谷兵衛增設營伍森肅永定防護爲  
掎爲角湯湯安流靖我畿服長隄千里以次修復雁行水榭  
鱗次淇竹淀河蜿蜒躔應析木考工疏排上邀 宸囑旣佑  
民命式登嘉穀 仁膏浹洽滋液滲漉遂滌九川迺宅四隩  
嵩呼介 壽綿綿萬祿 堯父 禹功天一地六

煌煌宸製懿鑠茂則天迴漢倬十光五色羅星宛虹垂麗  
八極勤政殿記表範無逸庭燎照晨宮漏儼夕勤政之  
箴忱忱乾惕韻賡寸燭陰珍尺璧或論民勤或論儉德  
懲彼遊惰惜茲物力絲粟民艱飲食爾質孔云君難聖論  
尤切曰戒瑑梓曰銘書席圭璋曷敬雨沐風櫛藻火曷貴履  
冰冕石用刑折獄義利損益天章辨說條分縷析鉅覘萬  
理橐籥羣籍麟麟炳炳若在埏埴或箴八旗或箴宗室  
化流金冶言鬯玉冊中星掌示南車指畫木棉圖繪序次眉  
列詩以詠之精義紬繹謂物無小菽粟布帛其他睿藻  
紛綸霍弈味餘之鑄初二之集薰紗媽歌卷阿周什重光  
日珥九苞鳳律嵩呼介壽大文烜赫揚輝奮炎襲六爲

伊古巡狩始歲二月歷夏秋冬無廢無缺展義省方治績周  
察彪炳鉅典日月昭揭 皇帝御宇七政允協四方望 幸  
遊原泳沫惟淀津地襟帶勃碣五百甸服實勤銍桔魚鹽萃  
聚輻輳四達 六飛般止輿衛膠轄侍從濟濟玉佩璆夏羽  
騎般般蟬聯鴉軋耆老存問和氣翔洽風詩陳觀民俗綜括  
熬波萬竈連虹五牖 皇覽畿服淵鏡周帀譽俊 召試茅  
茹采拔廢員甄錄瑕垢振刷雨之澤之豐美暢浹迺 閱隄  
工屏翰溟渤迺 閱水師鳧藻士卒 睿思宸算山含海納  
歲舉秋獮順時獻飲木蘭清霜柳城落葉七萃羽林駢闐  
獵唐弓夏箭參旂井鉞燕弧奮迅朔騎超越宣昭威武申明  
賞罰旃裘毳幕奉贄雜沓南燠北漑大鈞旋斡嵩呼介 壽  
祥霑 天闕羣流仰鏡典六柄八

我朝典禮舊章是守光照六幕儀炳九有 聖作 聖述

一中 授 受鴻藻景鑠乾樞坤紐三雍 臨蒞奠芹采芣

環璧林海宮懸矇眛序訪蔭槐鼓尋貫柳藍染玉琢義燦星

斗 經筵講藝理緒分割孔周涵泳笙簧左右松軒前席華

鐘大扣古義奧旨紛彝疊卣雝雝翰林儲材之藪西垣東觀

茲焉稱首 六龍時乘千官組綬才褒九能文探二酉 帝

藉四推膏壤千畝紺轅麗野洪縻在手方綵繁會弈弈 御

耦常棣燕飫行葦忠厚流甘麟圃發藻魚畱元春三朝 詔

宣天口 慶典始行愷樂飲酒告祭岳瀆色牲駢黝歷代陵

寢祠官奔走增秩予封貶祖父母旌榜門閭孝子貞婦豸屏

減刑雀獄棄咎育我嬰倪養我貽耆經壇緝屏 膳房儉取

大賚纓組環拱 旒黻醲麻汪濊 寶籙悠久降福榛桔

作人薪標嵩呼介 壽與天先後日升月恒頌天保九

九

聖駕臨幸翰林院禮成恭紀演連珠三十首

臣聞披繩握紐道在體元醲化懿綱法歸由舊是以 聖作  
明述證治法於 面稽文在揆同協 傳心於 口授

臣聞壹壹垂象闔闔陽開功敍攸同幅幘圍式是以 乾元  
見則嘉會聿啓文明 次九承休嚮福用敷作極

臣聞璿璣幹運帝政聯衡坏冶胥陶天臨共鏡是以 辰居  
宰化 重熙同出丙之徵 子惠孚祺宣 光符先甲之盛

臣聞天心靜運道蘊冬中帝志動後澤隨春布是以 文謨  
丕顯迓來復於黃鐘 成式善承普 大觀於青輅

臣聞熊泉奏凱鑾治漑中丹水蕩氛堯章殷正是以干戈倒  
載西師歡鐃吹之聲纁幣臚庭東觀仰 鑾臨之慶

臣聞響發春霆傳聲幽谷精舒晴旭不冒遐陲是以品物咸亨順動徵於一豫容光必照化成象以重離

臣聞方流弱水五色涵紋員嶠蓬山三霄朗耀是以花磚映日獨推地步之高芸閣峨雲再荷天光之照

臣聞戴匡環乙宿傍魁杓華蓋承辰垣臨柱史是以六星丁秩卜文氣之大昌七萃寅迎驗泰符之叶紀

臣聞玷阿洞闢氣御青陽桎杓森陳制嚴黃屋是以雲牕玉檻望幸施丹雘之華劉井柯亭近光晉奭輪之祝

臣聞澤笏鳴珂鵷行整序重英曲璫虎旅俠馳是以豹尾金鏐耀星陳於在藻螭頭珠履迎日馭以傾葵

臣聞體神合幾皞羲統接時和道泰洙泗肩任是以觀水伊瀾俎豆視膠庠之制降輿祗謁堂皇聞絲竹之音

臣聞合止笙庸九磬迭奏肅雍虞業六律旋宮是以徵鼓逢鼉咸池耀彩於听旭鳴球來鳳歸昌諧奏於天風

臣聞巖俎雕籩肴嘉脾臠鷄彝龍勺彩溢球圖是以庭饌芬燔班泰尊於九列天漿上壽咸踞蹠以三呼

臣聞縵宇垂雲薰桐晴拂紫庭溥露豐草陽晞是以彌性卷阿撫販章而麟集矢音蓬觀肆天縱以毫揮

臣聞柏梁肇咏藻續西京蓮院叨榮球琳東壁是以晁涇志樂七言聯漢代之珠鳳翰分題五字壓唐人之格

臣聞罄宜福祿儼列豆籩既醉威儀歡鳴歌嘏是以天心敦睦優游自序璫旒帝製焜煌廣和首聯華鄂

臣聞和羹斟雉位冠槐廳列炬鳴騶光榮薇禁是以鼎台高踐頭銜仍風月之班印鑰兼持揚對重舟霖之任

臣聞鶴輪御氣崑閬平游鰲背搏風星雲列約是以班分卿  
貳總乘漢渚之槎職改臺參悉預 鎬居之宴

臣聞華資儲幄秩轉宮階妙選端僚任仍館職是以詹坊設  
署垣依 左掖以分躔經局標銜筆珥 西清而並直

臣聞場開選佛雁塔題高路指登仙鴻逵儀肅是以庶常吉  
藹轂音諧萋華之聲中祕 光親鸞翥樂菁莪之育

臣聞右言左動管握金鏤前唱後喁調纍珠潤是以千篇奏  
御抒咏仁蹈德之忱衆響畢陳叶陰羽陽鳴之韻

臣聞珠斗垂梯干霄路迴奎雲臨棟飛白庭懸是以 義畫  
擘窠協兩儀而勝揭 龍書麗區婉八卦而山連

臣聞絺會彰施治觀媯象主璋特達品琢荆瑜是以燮理儲  
材 帝訓資其黼黼清脩勵品 皇言勗以廉隅



臣聞堯德巍巍曦光浹宙周儀郁郁景運絲區是以 文集

頌 三體三光以久照 詩編錫 五賁五緯以貞符

臣聞蚪篆經儲百家就範鴻都車萃七刻沿譌是以 睿定  
全文穹碣列三雍之廡 欽頌永式縹函同四庫之羅

臣聞學海觀瀾珠船薈寶雲章倬漢金匱儲精是以 書室  
游神 全集則三墳挾祕 法宮典學 初編則八載觀成

臣聞詩續風騷盛唐最著志符稷高老杜尤賢是以 五夜  
繙芸獨 賞光芒之在九家銀棗 新頌薈萃之編

臣聞龍垂九光螭螭景宇鳳呈五瑞苞采雲霄是以 心鏡  
高懸合萬流以仰耀 斗車廣運獎多士以舒翹

臣聞大璞含精周章瑜剖良金在貢夏鑄模程是以家握明  
珠共矢琢磨於道德士濡斑管咸思研鍊於都京

臣聞典謨垂則鴻冊充楣福祿來同麟儀扶輦是以神山百尺六十年週海屋之籌 帝座聯輝億萬載續詞林之典

聖駕臨幸翰林院禮成恭紀 聖孝符經論一首

子墨客卿問於翰林主人曰蓋聞聖人之出治也必將創制顯庸淳曜惇大摛之無窮而光之罔極是故堯曰文思舜曰文明禹曰文命后稷有思文之頌文王以文昭至於成王而制禮作樂雅頌以興典章以備故曰郁郁乎文哉郁郁者文之茂也然而祭禮之盛不過禘郊軍禮之盛不過大閱賓禮之盛不過會同朝禮之盛不過宗遇教讓之禮不過大射典學之禮不過辟雍頒政之禮不過明堂省方之禮不過巡守至於辛甲尹佚之史三皇五帝之書豈無典籍之府著作之庭而盛典無聞觴咏罕見書缺有間與抑遂古朴略之風未

盡革與今 聖上德通神明繼 統揚業區宇乂寧 仁治  
道豐迺遵 成憲申舊章以周甲之年如月吉亥 幸於翰  
林之署酌金罍傳玉爵奏韶夏邁英莖倡以 睿藻繼以賡  
歌卓哉煌煌自古及今未有若斯之盛者也夫其所以若斯  
之盛者何也主人欣然動容曰善如爾之問也夫天道至神  
也發以春夏斂以秋冬燦乎星辰炳乎日月而其所以運行  
不息者本乎健也地道至廣也停爲華嶽流爲江河植物斯  
生動物斯育而其所以厚德載物者本乎順也聖人之道至  
大也其仁如天其智如神函之如海養之如春而其所以輔  
世長民者本乎孝也書曰立愛惟親始於家邦終於四海記  
曰衆之本教曰孝又曰正其本萬物理仁者仁此者也義者  
宜此者也智者知此者也禮者體此者也樂者樂此者也故

知孝之大者其知聖人之道乎 聖天子纘承 丕緒茂昭  
大德措之而塞乎天地溥之而橫乎四海無他廣 孝思  
也惟孝故能繼 志惟繼 志故能述 事以修 前聖之  
業以紹 前聖之功以裕 前聖之鴻庥八方之內雍雍如  
也太平之治洽優游之望得然後斟酌道德之淵源覈覈禮  
誼之林藪崇禮官考文章永 世德而追 來孝此所以爲  
繼述之大成也所以爲人倫之準的也所以典文該洽爲古  
今之極盛也客曰 聖德之本於孝吾旣得聞命矣若夫  
聖孝之上際下蟠發邇見遠者吾猶未能徧舉也吾子讀孔  
氏之書述所聞誦所學講明高誼之日久矣盍亦敷陳其略  
使下走昭若發矇焉主人曰唯唯昔者孔子蘊大聖德師表  
萬世修春秋以正君臣父子之法說孝經以明君臣父子之

行知其法者修其行知其行者謹其法故孝經緯曰吾志在  
春秋行在孝經又曰春秋屬商孝經屬參是知孝經與春秋  
殊塗而同歸也左氏受春秋於仲尼而爲之傳身爲國史躬  
覽載籍則廣記而備言之皆經國之常制周公之成法人事  
浹王道備矣夫聖人者動作中道從容中禮不求合於聖經  
而自無不合者也蓋嘗折衷孝經參考春秋以證大聖之  
孝與夫聖孝之見於行事者若合符節其揆一也謹案孝  
經曰先王有至德要道以順天下民用和睦上下無怨釋之  
者曰天下之人被服其教也聖上觀我觀民克順克比豫  
順以動故天地如之而況羣臣百姓乎故君子則同寅協恭  
小人則睦婣任卹普天之下風動草偃被上之德厚若百  
穀之承膏雨渟然而興翕然而應不知其所以然而然也則

至德要道以順天下者也孝經曰愛敬盡於事親德教加於百姓刑於四海釋之者曰刑法也君行博愛廣敬之道當爲四方之所法則也 聖上愷悌旁流溫恭允塞有孚惠心惟敬作所是以民生敦龐和同以聽慈孝於父母弟長於州里愛親者不敢惡於人敬親者不敢慢於是彝是訓于 帝其訓爲法於天下可傳於後世未有大於此者則刑於四海也孝經曰夫孝天之經也地之義也民之行也天地之經而民是則之則天之明因地之利以順天下是以前教不肅而成其政不嚴而治釋之者曰因和以教愛則易知而有親因順以教敬則易從而有功 聖上量等乾坤道參覆載 詔書數下而天下詠歌蹈舞咸稱 聖德之隆也長吏奉行而父老扶杖來游皆慶德化之成也此豈有政令發徵期會哉

又豈嚴刑峻法驅而迫之哉下令於流水之源而政成於置郵之速也則不嚴而治不肅而成也孝經曰先之以博愛而民莫遺其親 聖上躬行孝德中心安仁是以化行俗美於變時雍入則孝弟出則尊長養老而教成矣則先之以博愛也孝經曰陳之以德義而民興行 聖上建其有極錫厥庶民著之話言陳之藝極予之法制告之訓典道之以禮則而後衆著於父子尊卑長幼之節矣衆著於父子尊卑長幼之節而不興於仁者未之有也則陳之以德義也孝經曰先之以敬讓而民不爭 聖上秉莊敬之心表謙沖之度型仁講讓示民有常是以六合之內靡不和寧崇推讓之風以銷分爭之訟焉則先之以敬讓也孝經曰導之以禮樂而民和睦 聖上大中至正既和且平聲爲律焉身爲度焉是以德暉

動於內而民莫不和敬理發諸外而民莫不和順也由是以禮教之中以樂教之和故其感之者易也則導之以禮樂也孝經曰示之以好惡而民知禁 聖上旌別淑慝樹之風聲彰義癘惡順天庥命將以教民平好惡而反人道之正也故不賞而民勸不怒而民威於鈇鉞則示之以好惡也孝經曰言思可道行思可樂德義可尊作事可法容止可觀進退可度以臨其民是以其民畏而愛之則而象之 聖上發號施令罔有不臧出入居處罔有不欽其色郁郁其德嶷嶷其動也時其服也士脩身而天下服則畏而愛之則而象之也孝經曰孝莫大於嚴父嚴父莫大於配天 聖上春秋匪懈大禧是承雨露既濡則有忱惕之思霜露既降則有悽愴之感 郊祀 宗祀饗 帝饗 親戚秩無文肇稱殷禮敬



之至也則 嚴 父配 天也孝經曰事父孝故事天明事  
母孝故事地察神明彰矣 聖上小心翼翼昭事 上帝燔  
於 泰壇瘞於 泰折故升中 天而 天神降 地祇出  
享 帝於郊而風雨節寒暑時也則 天明 地察也所謂  
孝弟之至通於神明光於四海者蓋如此若其 大經大法  
考之於古彌見 孝思之不匱焉謹案春秋謂一元之意視  
大始而欲正本也春秋深探其本而自貴者始故爲人君者  
正心以正朝廷正朝廷以正百官正百官以正萬民正萬民  
以正四方四方正遠近莫敢不一於是是以天地順而四時  
當民有德而五穀昌也今歲在甲子上同 前聖甲者日之  
元也子者辰之元也 聖上位在德元而備乾元之德體衆  
善之長上承天之所爲而下以正其所爲正孝道之端矣故

有崇儉之孝焉有勵勤之孝焉有官人之孝焉有誠民之孝焉有篤本之孝焉有求善之孝焉有奮武之孝焉有揆文之孝焉 聖上御極以來崇本黜末爲天下先不寶遠物不貴異物有以玩好入貢者必 下詔却之所貴惟賢所寶惟穀是以四海之內謹身節用恥纖靡而賤奇麗也春秋傳曰儉德之共也又曰夫德儉而有度此之謂也蓋崇儉之孝也

聖上法 天行健惟日孜孜引對臣寮披覽章奏事無鉅細皆秉 睿思自朝至於日中昃自強不息而又揆度周詳貫徹終始凡臣工襄贊所未及者 聖心已先及之率作興事屢省乃成誠所其無逸者矣春秋傳曰昧爽丕顯又曰君子朝以聽政晝以訪問夕以修令此之謂也蓋勵勤之孝也 聖上旁求俊乂迪簡百僚敷奏以言明試以功而又黜陟幽

明有善必獎有過必懲 特命大臣各舉所知以襄治理用  
是百工惟時庶績咸熙大法小廉皆奉 聖訓以爲程式春  
秋傳曰舜舉八愷以揆百事地平天成舉八元使布五教於  
四方內平外成又曰舉不失職官不易方爵不踰德此之謂  
也蓋官人之孝也 聖上子惠庶民邁恩種德偶有偏災亟  
籌賑卹議蠲議緩史不絕書猶以爲未也則又爲之清漕政  
之弊浮收折色在所必懲也爲之重河防之築發帑修隄不  
惜重費也伏讀 工賑紀事一書想見視民如傷之隱焉春  
秋傳曰上思利民忠也又曰柔遠能邇平之以和也此之謂  
也蓋誠之孝也 聖上敦敘九族恩明意美屬在 天潢皆  
承 渥澤而又廣仕進之路使得爭自濯磨故其英俊之流  
成進士入詞垣者彈冠相慶也夫親親故尊 祖尊 祖故

宗敬宗故收族收族故 宗廟嚴 宗廟嚴故 社稷重

社稷重故愛百姓愛百姓故刑罰中刑罰中故庶民安庶民安故財用足財用足故百志成其所因者本也春秋傳曰庸勳親親暱近尊賢德之大者也又曰葛藟猶能庇其本根故君子以爲比親之以德皆股肱也此之謂也蓋篤本之孝也 聖上廣開言路公聽並觀在廷諸臣剴切指陳者咸蒙聽納矣乃至草茅之士詣 闕陳書苟有一言之善亦必獎勵之褒賞之以爲敢言者勸況復仰觀天象俯酌民言開導求諫虛心延訪縱使數陳鮮當効奏已虛而 訓飭之中猶寓寬容之意所以讜言懿論咸含和而吐氣也春秋傳曰訪問於善爲諮又曰自王以下各有父兄子弟補察其政史爲書瞽爲詩工誦箴諫大夫規誨士傳言庶人謗商旅于市百

工獻藝此之謂也蓋求善之孝也 聖上誕展威棱恭行

天討 命帥整旅捷奏頻書凡勦撫機宜皆仰承 睿略用

集鴻勳而 巽命重申必稱 天 考垂祐天下仰 純孝

焉是以歲屆壬戌三省底定至於癸亥之冬經略親上印信  
以告太平當是時也銷烽徼塞偃伯靈臺走馬卻以糞車兵  
甲藏之府庫示天下弗復用武矣春秋傳曰夫文止戈爲武  
又曰夫武禁暴戢兵保大定功安民和衆豐財此之謂也蓋  
奮武之孝也 聖上嘉惠儒林譽髦斯士庚申辛酉特廣鄉  
會 恩科每至春官試士 金殿掄才簡拔之數必踰往昔  
入詞館者多至九十餘人少者亦不下七十餘人濟濟多士  
稱極盛焉又於 臨幸翰林之前一年 特諭太學敦崇教  
化 申命學政謹庠序之教六合同風九州共貫炳炳麟麟

不亦懿與春秋傳曰敬教勸學又曰其士競於教此之謂也  
蓋揆文之孝也夫崇儉孝之守也勵勤孝之行也官人孝之  
用也誠民孝之施也篤本孝之實也求善孝之著也奮武孝  
之崇也揆文孝之成也而揆厥所由則曰愛曰敬愛敬之至  
而施於政教以順天下則先以博愛陳以德義先以敬讓導  
以禮樂示以好惡至於言可觀行可樂德可尊事可法容止  
可觀進退可度動容周旋中禮者皆孝之徵也 配享 上  
帝 天明 地察行乎陰陽而通乎鬼神窮高極遠而測深  
厚皆孝之致也孝經援神契曰天子孝曰就言德被天下澤  
及萬物始終成就榮其祖考也今 聖德光被四表茂育庶  
類其爲成就也大矣於茲乎右文稽古昭光振耀 高宗作  
之我 后述之六十年來 後 先相望永保鴻名而長爲

稱首夫如是榮之至也易大傳曰聖人之情見乎辭伏讀  
聖諭有曰上繼前徽恩榮藝苑蓋惟孝爲競競焉夫孝  
德之本也教之所由生也故曰聖人之德無以加於孝乎今  
子際古今之極盛而不考其本故不能徧觀而盡識也民  
無能名而知德者鮮矣客旣醉於大道飽於文義迺喟然而  
稱曰至哉聖人之道乎下走學識禿昧未足究萬分之一  
今聞吾子之言迺知大聖之達孝咸在乎此是宜恭紀  
典訓與孝經並垂因述法制政令繫日繫月作春秋一藝  
傳之將來俾萬世常戴巍巍履翼翼蜚英聲騰茂實斯天下  
之上則也豈不盛哉

聖駕巡幸淀津 閱視河隄各工恭賦

陸序

皇上紀籙之十三年函海清謐河濱薦祉 率作省成不敢

康娛 德輿造游用 保乂我區夏發春始飭 巡河敷政

啓蹕而南九流鏡清三輔雷忭洵乎揚 景鑠昭允翕矣

先期 申命百寮景從作肅左右翼濟廉貞介中煌哉 疇

咨 合撰清甯與民飭會泰初之懿也敬推 紹 庭 錫

類新民之原昭假 在天 謁款登告遂乃 按行甸服奏

志 觀風深維淀河隄防成憲式敍富人惠民溥通廣會

帝錫敷奠 光纘 前徽於是 周覽瓊埭懷溯引度休氣

畢達地節疏中畿南三百餘水盤渦轉轂罔不折溜順軌協

乎永清 禋祀所被伏靈遙紀故阿明祝融巨乘禹疆之神

輯馬銜海童鯢壑鵬溟之路夷天池地脈黃星赤鸞之禩寢

堯河舜洛同符聖功不其偉歟伊考自隆古降莅爰茲大化

陶甄匪文不昭震聲日景匪武不宏 皇儀飭備經緯綜成



湛恩龐鴻鋪衍下士夫輶車 免算 延惠也器幣 逮  
下 廣澤也牢盆 加賜 卹商也緡帛 頒賚 引年也  
考職以賦政 賜酺以飫民卜河圖之經啓酬海若之飭  
衛茲典用 示無逸 順 天 憲 祖 考旣慰海內之  
慕思又散 皇暉而燭幽矣方將 加勞三王 勗勤五帝  
握金鏡 奉泰符五運克昌永以彌彰赫赫乎 聖清之  
丕烈惟德萬年其疇不歌舞於茂鬯之 德也哉 經術  
弇陋行能無殊異渥蒙 恩寵惴惴業業媿無以答 洪貺  
顧躬際 憲度之煌燿逖聽風聲不自揣度竊欲離容 盛  
典萬分之一校士之餘謹撰賦一篇拜手稽首以獻曰  
歲在著雍月維丙辰陽旭抱珥以舒轡惠風吹琯以薦春八  
寓舍飮而康弗百靈效職而殷麟 天子乃 儲恩垂佑順

陽播仁察璣衡以昭寓運斗車而觀民眷畿赤之  
蕃翊動大輅以時巡懿夫時巡之爲禮也天緯其符  
地闡其社觀雒啓儀受書繼軌維前謨之洪鬯乃超姚而  
軼姒修防禦於豐國貽利濟於萬禩帝紹猷於無疆  
憲鴻規而大起崇祥飭於歲習按皇圖而躬履繁析  
津之奧衍實扼要乎漁陽九子忻忻以秉曜紛燦錯而式天  
行隄陞輶而罷藹水陸輳而阜昌體爽塏以藩衛廓離奴而  
峙疆其地勢則控引青齊結淒燕趙盧白掎拔漳滏迴繚大  
陸趨欬其納流小洶炭漫而界道呀開雄城盭盭海門巖巖  
垓圯陂隕潰淪腰眇氣躋煇脰崖隣繫若木之翔陽圖天一  
而星陳內市百隧通中四周瑞鸞蚩眩泉刀羸優儼壽衆繆  
惶呶嘲啁貨殖之選翁質之儔輸茜卮而畫畝課薪膏而連

朝禺筴開場估權列釜素液醕醑元滋剛鹵軼廣舄於二岳  
燭火城於參戶豐羨地寶珍貢天府姜賴之盪無以疇宿  
沙之煮非所伍外垺隱脈嬰堞帶浹蓄畝靡迤原隰平砥陽  
藎蒔膏陰蔽澍水鄭白之沃如苴是理若乃濟飛挽通都輸  
五節兩遞百舍一趨砮岩擊汰殷闐接艦規飛雲與蓋海腴  
太倉而歲儲伊茲區之豐蔚介廣會而清奠陵蹠峻阻陪  
拱畿甸扶來所演大章所羨蓋縣亘夫七百餘里而環匯乎  
九十九淀惟祖惟宗效法乾行時乘節宣升踐  
納成障易涑而北注濬濡澗而東傾溫義亢其首會同導其  
經扼以茅彎掖以中亭疏以臺頭滌以大清澎瀋鬱礧匄匄  
糾匄洩尾閭而順軌轉地軸而永貞屹然千里長隄興焉表  
神委接方瀛壁立霞駁石走雷蒸宛虹矯尾而岸起蒼龍掀

脊而雲乘下穴繁詭來自溲溲夔拓跬翹駢馬甬騰攬搜濳  
澳拊拂潏潏廣莫扇其陰火匱空嚙於陽冰 帝德奠父  
大功乃登誠 巍翼之令軌俾萬禩以丕承也 皇上體膺  
上聖 運鍾下武 肇元邁乎得一 繼序隆乎咸五 鑒  
前憲於已成 眷民生於安處 下明詔 嘉惠予 籌  
水衡 頒少府 簡命重臣畀以謀諝神皋繁輿訾次宣房  
之舉崇防巨設彷彿天柱之阻謁者告成於三時閔貺乃超  
乎邃古諏吉日申 先型蒼史司啓條風布榮 皇祗發生  
於基始 法駕式序於天行 御黃屋翼紫衡澤馬沛器車  
升 鳳蓋綏離鸞絳轡振前旌導乎朱雀 屬車配乎勾陳  
熾阿掌轡豐隆御輪蜚廉斂颺而啓塗屏翳垂囊而靖塵導  
星駕謁 東陵展 皇軒而肅震崇吉蠲於豆登 天儀

儼乎羽葆景光發乎樵蒸軫軫殷殷鏘鏘莘莘 帷幄山舉  
帳殿雲屯乃經 南苑武節時循啓梁騶而講事豐圃帥  
而蓁蓁不輶不煩 肆勞以身時猶未轅夫淀津也爾其繡  
壤複陸以碁布綺甸交錯而迴曠過涿南而 問俗 莅趙  
北以 駐仗 御彩鷁之安鱸 乘行春之仙舫組緯照波  
而旖旎鏡流迎楫而瀆漾芬港紆而欲迴蘇橋翼以相向璿  
原會氣以布藹珠貝含光以呈貺蓋已見休嘉之布瀼而  
天子更有事於 咨訪於是 升政彝濱 輯瑞大防 底  
定經瀆 欽承靈章表初星而上應禮陰祇而載光紺蓋白  
璧之薦赤水翠鳩之祥五精帥而來格永奠乂乎園方 莅  
行殿開 祕閣周軒中天重桴外廓複道金椎綵疏寶絡承  
以陽馬棲以神爵正坤元之中基規太紫而將作 日馭翼

扶宸居景屬於是 皇歡緝穆輿情有融摯紳藹藹軒冕  
離離慕大雅之宏達頌帝化之醇醲左舞右歌蹈德詠  
功莫不優游而自得報夙夜以靖共 文謨式昭 武烈  
宣振六師禱禱勒隊列陣鉦鼓砮礮以震響部伍坐作而旅  
進戈戟續以森奪騶驅騁而奮迅陸讐水慄九垓在制信  
秦武之上儀羌肅承乎彝訓爾乃考聲教之所被敷  
汪濊於天波興郡國之秀孝振庠序之菁莪頓八紘以張  
網獵瑰材而畢羅赤紱拜策而勛政黃髮奉帛而飫鰥旬壤  
寬賦以皞皞卒伍增餼以番番起放廢而叨慶予矜灾  
眚而免謫科惠工商以下逮納市價其無頗億兆沐浴於  
膏澤德音遠越乎卷阿允紹衣乎祖武利美利於  
作訛惟御天而不息象曦月之盪摩遂乃風舉雲搖旌

迴軸轉父老持輪靈祇翊 輦第羣臣之嘉頌采游童之歡  
諺 命白阜以稽圖按朱子而紀典緬 櫛沐乎雨風孰驚  
馳於封禪且夫 皇帝八窗廣達九皋遠聞猶復 採風  
詢俗 六飛時巡豈玩華而慙觀抑好勞而忘尊蓋念 天  
位之至重 求民依而必親恐長吏之浸懈慮幽隱之未陳  
矧虞書之肆覲固濬川以繼逮禕九澤之旣陂先盡力於畎  
澮宣灑濬之神功逾鄭白之沃漑雖靖奠於天綱尙防維於  
凋瘵猗土功之攸同乃 勤憊而 時邁然後 總集天瑞  
渥致地符 聲從雲翔 化洽雨濡 誼方激而遐驚 仁  
風衍而外敷 撫八區以遠輯 規萬世而廓圖將 含義  
蘊燧 甄唐陶虞曾何周般之能擬而夏豫之足模敬作頌  
曰

於昭 聖謨 漸海洋洋 榮鏡萬流謨觴九方山嶽修貢  
淵澤順行維彼冀川載見榮光冀川伊河紆縈沾淀屹然大  
都 玉京屏翰旣防旣築實隄實堰轉粟是通熬波是贊自  
我 聖祖 乘輿四臨 純皇顯穆 五巡逮今 經畫孔  
周萬靈翼欽貞珉 天藻勅此欽崙 帝曰疇咨 朕曷敢  
逸 覃敷生民 基命宥密司空告功與歡望 蹕 思對  
厥忱言諏其吉六丁挾輶大乙扶輪 翠華東指 懷我黎  
元六府修治 九功釐甄惟歌惟敘 禔庥翕轅 平成地  
天視此淀津 皇儀孔昭德水攸伏有幹有年道在 化育  
申問疾苦補助不足率時 大卜謀之鞠之凡百有位扈  
從 行幄 誠厥苞苴甯守蹢蹢愛及秋豪壺漿豆肉 帝  
仁浩浩登物鴻濛如聞嶽瀆拜舞呼嵩爍哉 盛典義軒媿



崇顯允 天子萬福來同

恭進 起居注册前序

嘉慶七年

欽惟我 皇上 得一居貞 奉三建極春之溫秋之肅謂  
大順而撰合 乾行德以道禮以齊致中飭而昭登 泰運  
彝倫攸敍 教周治於七年吉事有祥 德茂存乎 六世

繼述善肯堂肯構羸勩 十全覲揚在 丕顯 丕承咸

醵九有茲者有壬推幹任養既協夫資生在戌占枝奄茂更  
徵諸藏用欣逢 治定功成之會允際階平衡正之時臣等

效職編摩叨塵侍從趨承 螭陛祗扈 鸞輿仰 身度聲

律之有恒偕珥筆簪豪以就列伏見我 皇上觀孚昭事

巽命通微典三禮則豫戒潔齊秩百靈而端歸精懋饗 皇

穹於正月 祈年祗練初辛宜 大社於仲春諱日弗移次

戊 泰元 泰折璧琮展二至之儀祭日祭星黼藻承三光  
之照蒼龍見宿時膏祝雲縈濃渥蔥悖行鞭 御耦禮農祥  
夙正待澤禱 三壇之澤靈昭先甲無淹 作師尊萬世之  
師奠釋上丁惟恪四時承饒 元堂並致夫思成大祐居  
歆 太室專通於奏假元正朔 戒塗展慕愴雨露之三週  
東西陵追遠抒誠分春秋而 再謁慶工成於永定紆僉  
騎而荅麻蘇奏軌順於長河賚神香以酬肸蠁西域以狸沈  
設版仍原文則歸善垂型太常以毖祀騰箋先 披覽而潔  
衷薦敬愛則存懋則著咸秩無文力於民成於神聿懷多福  
粵自上年之霍潦實爲三輔之沈災緬 舜倣而工賑成書  
溯 禹功則府事允治猶恐一夫之不獲切厪 九陛 之  
疇咨封圻未逮函陳蔀屋已先 燭照鴻敷安集計食而普

與行糜鶉結改爲授衣而溫添挾纊十廠五廠類增弗限於  
柏冬三旬兩旬遞展直臨於蒲夏臺卿監放毋嗟貿貿而來  
官廩宣頒借得原原而濟水冲沙壓對戶帖而全除潦溢旱  
乾核名糧而半入大窪標著卿帳準以七成平糴通融市價  
昂而再減免三蠲五償其清 蹕路之塵貸舊徵新緩尙待  
來年之熟列之剡牘獎牧民撫字之殷紱以名銜旌庶士急  
公之誼取禾三百寒棲早輯夫流庸出帑五千歲息永存於  
普濟 施恩邇甸屆 澤寫鄉五嶺東西太行左右爰及於  
雍豫荆揚之域兼逮夫滇黔蜀隴之疆偏災偶致庚呼大吏  
隨而辰告蠲符迅下逋籍連除極貧迄於次貧胥謀宿飽本  
色通籌折色溥給優饒籽借三倉權息詳差於減免賦寬兩  
稅稽籍毋混於畸零寇擾邨莊疊寬倚閣師行枕席仍弛納

司酌復旗租查民欠官侵而別辨徵隨耗羨借站銀屯餉以  
胥蠲蘆洲毗及漕河攤徵遞展鹽場區其井竈緩課從同金  
礦苗徵定減廠夫之額山場木盡宜刪商稅之條准蠲餘糧  
憫運丁之支絀承售官豆卹車戶之拮据上下之交接以誠  
覈軍需何容飛灑夷險之相縣無定揆形勢亦與通銷惟茲  
發政而施仁悉本損上以益下蓋五行並列以水爲先而  
八政同陳惟食最重桃浪駭唐轡之潰疏漲則湖共霜清桑  
乾安石洫之瀾沔流而溝連月曉粟供天庾清浮收折兌之  
原幫轉雲飄剔津帖廝留之習掃三代以遙之糝政紹百王  
以上之薪傳講筵開內聖之宗 御集示大文之煥籲俊溯  
建元之歲屆已成三登賢寬拔十之途數期得五宗枝射策  
題雁塔者同步瀛洲貢樹標香躍龍門者分通華籍科今拔

萃彙徵而重擷茅茹榜昔掄元明試而再留芸館曠典曲覃  
繙譯貢士開科向隅慰及新安容童在泮會闈詳勘黜珷玞  
之久混圭璋流品明甄著阜隸之先非欒郤 訓于蒙士繹  
實錄之崇實去華禁厲稗官務讀書以移風易俗惟辰居  
星拱政以德成卽畜衆容民師由貞正若夫教匪之滋蔓  
已爲殘劫之零灰竄匿於陝甘楚蜀之疆錯雜夫黃白青藍  
之號元日朝 陵之次 御行殿而適奏薇歌季秋校獵之  
前 駐鳴鸞而遞傳竹破期臨 北時疊飛報訊之章日近  
南郊豫報殲除之兆矛矢集黑甜之境夢蝶無歸罝罟結  
綠刺之叢窮猿忽掛漁沱洗甲洪濤自沒夫飛颺華石傾巖  
危竄立享夫走狗鳴咽鳳溝之血一束流蒲悠揚佛洞之魂  
三摩斷度火炎砂罐鐵板煙消烽到芝芭么磨風化驗鄆瞞

之族骨每專車數貳負之囚尸皆反梏三帥會米倉之道九  
衢歡露布之騰而且撤臺海之豎旗毀羅浮之爛展符離寇  
警霧障旋空木刻夷傳雷波不沸凡此鴻猷之耆定發  
機咸在肝宵而逢駿捷之遙宣垂祐必稱天考至於  
述寶訓而獮禽習勞因之肄武順金行而表貉結戎寓於  
懷柔載纘成謨用諏吉日虹旂左轉仙莊緬陟降  
之靈雲罕前驅文囿迓兜離之部剎崇黃教名藩瞻步  
踏而皈依星耀青林徒御效伊緜而麋集筵呈狎馬教駢本  
馬政之經射節騶虞卽鹿課虞人之績御威弧而滿月同  
看中必疊雙較舉柴於昔年誰竟吞其八九哨門重閉有嚴  
出柙之防戎幕專開獨擁圍場之節典原由舊玩則加以作  
新帖雖無名人必求其得實庚郵遄達聽到投籤乙夜勤

披咎無留牘月銓引對恒量缺以簡材秋讞持平期無刑而  
止辟 恩施驩浹下覃列卒之鏐銀 禮洽鑣迴順簡軍門  
之組練顧纘 緒毋忘遠略而 冲懷尤察邇言臺臣提風  
紀之綱豈供隨帶京尹置堂皇之署何事僑居列廡多儲合  
付巡邏於司隸外郎徵秩亦應收錄於考官章貢阻饑量汎  
江淮之糴郊圻仰食權通遼瀋之商雙縑賚陝士之數陳勉  
以潛修待用側席伫藎臣之忠謹戒其摭拾浮辭每 詢采  
於芻亦言示其莠司道職當核轉畀專讞則大府綴旒膠庠  
使以論升兼巡察而持衡離局糾保留於銓部事覺文深取  
進止於機廷權將畸重靈臺驗蝕奚可誣於皆仰之時輿誦  
成碑何必復其去思之舊歇山違倫創之禁況聽私裁司坊  
本緝捕之官甯邀濫敍梅針換移星斗施鎗者自昧棲皮玉

英充斥闐河貢珍者真堪抵鵠擯爾荒唐之舉漢字右行摘  
其望蜀之私崇銜兼乞勘黔中之翻案無逃反噬之情正粵  
省之爰書獨照相傾之隱咎寡謀非緣失律詔節使之戕生  
稱親歷爲懼緩師逮撫軍之飾奏鵠圈起獄罰同麗於資緣  
蝗旱隱災譴並繩其羅織燬寶華實由焚寺原一線出自無  
心伐雜樹因在依敖連九圍誠爲多事絕業本皆叛產撥民  
勇而務審均平普兒通自回疆憑市集而毋拘定價供職既  
能黽勉詎不可假以理煩在官叢積處分更何取調之治劇  
聽其言不勝觀察且教粉署含香徵諸民謂善拊循復起華  
封綰綬斯皆積恒沙而擬其紛蹟無不歸宸衷而析及豪  
釐至若眷良輔之引年予告而仍支祿精愍宗藩之謝世輟  
朝而備考彝章惟矢慎而禁闥曾趨勞特酬其平昔若克



勤而提封久歷卹且及其後昆給回子之孤糧還許去留從  
便停旗丁之扣餉切教節儉謀生至盡掃夫櫓槍更優加夫  
酬錫或展專征之略或參密勿之謀或效儲芻置駟之劬或  
襄團練緝偵之役鉅則分圭儋爵繼世賞延次猶紱紱升階  
及身榮受旣以一猶同署追視從賊之游魂卽看雙烈標祠  
或妥勤王之毅魄子身出險旌能有懷印之寡妻西子捐  
軀憐老見賜金之嫠母隱無幽而不燭澤靡遠而弗覃  
是以馨業登閔蘿圖襲慶仁育衍大生之化產三男  
者八家壽祺溥難老之祥逾百齡者廿口補叨秋賦登科  
多黃髮之人親歷春闈加秩盡龐眉之士雁使值年班偕至  
聽臘鼓而閱冰嬉鴻臣朝正朔胥來迓春旂而瞻火戲農耐  
申復讎之義籲新綸以再造南交廓喀達表貢之誠候遙

邊而優綏西汜然猶握機無逸祇求於益治益安 飭紀有  
常交勵於汝爲汝翼寅朝票本 命閣老以常川午日承  
宣議部臣之夙退政府就 道綱德綱絜八表以珠囊情田  
在 學耨禮耕調萬年以玉燭臣等依 光最近倖值無虛  
有舉必書猶或有虞於星漏其文則史無敢稍涉於鋪張約  
以銀繩 熙績光昭綠牒藏諸金匱 祥暉流綯丹縢

嘉慶七年恭進 起居注後序

欽維 皇上允文允武克儉克勤仁育羣生義征不譴盛德  
大業合撰清寧八埏九垓以內靡弗泳沫游原澍濡洋溢而  
聖敬日躋緝熙罔斁是用大烈耿光懿鑠隆茂超前古而  
浹來茲俾夫五三六經莫能方駕於極軌焉臣等侍直 彤  
扉仰瞻 雲日珥筆登載厥職有常茲者恭纂嘉慶七年

起居注册成凡二十四卷珍藏石室爲億載無疆之床竊聞  
聖人之德無加於孝鬼神所享惟在克誠 皇上懋膺 丕  
緒昭事小心 祈穀元辰 雩雨吉亥蒼璧薦乎 皇穹黃  
琮禋於 富媪 追養蒸嘗則典修四孟躬耕 帝藉則禮  
舉三推遍及於 朝日夕月之壇致虔於 至聖先師之廟  
推而至於 黑龍潭 覺生寺爲民祈澤胥蠶豐融而其盡  
美盡善者祈祀 社稷日遵上戊 聖慮精詳準今酌古播  
禮官而垂太常以篤天慶至豐也以迓神庥至誠也若夫雨  
露旣濡 宸衷忱惕錫類之心感物增思故正月上日 鑾  
輿載啓恭謁 裕陵行三週年禮及乎以獮治兵 御射雙  
鷹敬獻 永佑寺 返蹕之日展拜 東陵以昭誠懃而至  
十有二月預計上春 齋戒之期與 純皇帝忌日相值乃

降 諭旨改 御青袍蓋思慕之殷久而彌篤所爲至德要

道通神明光四海者垂之無窮施之罔極是故 類 帝

禋 宗則昭假隆矣奉 先思孝則慈愛達矣事 天享

親稱情立文而仁聖之道崇矣然且敍官方卹民隱飭言路  
慎刑章重河防清漕政典試而受苞苴則貶之而大吏逢迎  
者又加以申飭也聽情而招賄賂則遣之而同謀過復者亦  
予以懲創也侵沒錢糧之員事經舉發欲諱飭而無從私買  
鉛丸之官罪已昭彰疚 國恩之深負購物而吝價者褫其  
職以儆官貪家居而牟利者弊其罪以除狡獪取贓罰以辦  
公稍從末減借調停爲狗庇難任旬宣允協輿情不以小眚  
而離任曾經告發必專長吏之責成以崇舊例則年例驗其  
不符以慎卿班則考語嚴於各部飭京尹居辦公之署諭閣

臣勤到館之期統領則毋攝秋官總兵則勿兼都統請訓遲延則懸以爲戒舉止粗率則降以爲郎杜營求於攜帶之員防專擅於隨同之奏毋曰疎懶退食何可獨先毋或紛更加銜豈容妄冀服滿而未請差者責必加摺繕而違體制者遷必左正酷暑濫刑之罪罰匿蝗不報之愆賑卹能周宜膺大員之保奏官聲可採更慮州縣之效尤案未結者考語奚以從優咎不深者參劾毋庸過當冒功捏飾者燭其欺誣據實上聞者嘉其公正交章入奏識挾私傾軋之心殘孽易除詰奏報張皇之失擢授者鑒聲名之廉潔起用者恕軍旅之不嫻皆皇上所以敘官方也畿輔偶饑疇咨時切平糶於廠簡重臣以監之放飯於郊命卿貳以司之慮其遺失則飯廠不須分設虞其倒斃則各縣毋俾領回米麥廣儲則人可以

飽棉衣散給則民不知寒展賑端陽咸仰恩波普治近京關口務令商運通流米頒三百軫無業之貧民銀賜五千作將來之經費普濟堂既展一月之限文安縣又卹被水之村謁陵則蠲免有差 駐蹕則錢糧盡復地減旗租之數糧免蟲患之鄉始於輦轂之旁遍及方州之遠孟春始和首賑甘肅皋蘭等四十四廳州縣其後則川陝楚豫浙水滇池山東江右之區百粵七閩之地旁及江左至於安徽關東被水之城蒙古兩廳之境偏灾偶告荒政先籌況復酬厥捐輸憫其蹂躪或緩徵丁銀或借給糧種發倉施賑 下詔捐租螟螣攸生慮及毗連之省義倉碾運以資糶糴之平緩南河攤徵之款准弁兵押解之銀熱河之賞賚有加鹽場之蠲賑從厚剔以銀折錢之獎頒難民給產之恩哨船遭風者卹之軍營

落後者寬之皆 皇上所以卹民隱也 披覽章奏鑒別妍媸請重軍機之責成指其謬妄諫止木蘭之巡狩出自沽名奏秋審之事宜瑕瑜各半陳時政之梗槩准駁兼施崇文門稅請暫減議不可行常平倉積本宜豐事須交部進揀選武舉之摺不知其得缺無期論察核部員之方詎識其銓政有礙多用庶常知縣敷奏者燭其取巧之心揣摩天象日躔進言者指厥妄談之謬給頂子銜豈可及堵禦無功之輩赴川給票適足開吏胥勒索之端督撫須待之以誠安有任司道之理學政乃使之校士柰何操巡按之權首府取諸京察何能熟習情形稅票問諸地方反足侵漁商賈補缺本非越次則參奏者已涉虛誣升官或謂不符而練習者無嫌入選至於時屆仲秋 天子乃以日食求言諮諏察納蓋所以集思

廣益執兩用中無論博訪在廷兼資羣策下至寒微一介詣  
闕陳書苟效芻蕘之獻猶膺綵緞之榮好問而察邇言有如  
是者皆 皇上所以飭言路也重職官逞兇之罪定大員釀  
命之條事由義憤者矜之釁出同謀者戮之在賊而自投者  
免之兵勇而恣縱者誅之聽從糾刼分別而舍重從輕情切  
救親留養而準情酌理誤戕營弁憐其出自無心焚毀寶花  
法可原其一綫嚇詐本官實無可贖之罪匿名揭告必窮干  
禁之人持衷敬折獄之心斥改緩爲實之誤及至勾到之期  
重加審定罪疑惟輕辟以止辟好生之德洽於民心皆 皇  
上所以慎刑章也季春之月 駕詣 惠濟廟拈香 欽閱  
永定河土石各工於是添設河兵以資防護議敘人員以慶  
成功運河則淤沙必濬黃河則堤岸加培至於唐灣民堰偶



有奔流猶命重臣勤勤堵築藏香遙賁神貺潛孚此 皇上  
所以重河防也申命有漕各省毋取折色之糧毋踵浮收之  
弊買米運通參以時價餘糧出售愛及旗丁此 皇上所以  
清漕政也而由是勵臣節則從逆之黔撫撤焚牌座而兄弟  
死事者特建雙烈之祠也辨等威則侍衛帶版毋敢借用親  
王而藻園之門未賞馬匹者不得擅乘也獎義民則雇募鄉  
勇之紳士在所必旌也予忠勇則奮不顧身之臬司用膺懋  
賞也通飭各省營伍勤慎操防毋或擅役兵丁毋或輕改舊  
制迨至秋獮 回鑾大閱古北口行陣整齊技藝嫺熟則營  
伍之所以修也歲屆大比試事綦嚴掄文貢院對策彤墀榜  
首同是一人館選更踰舊額得人之多於斯爲最而又精選  
繙譯局闡考試他如比校選拔貢生分別內外迪簡多士其

有耆年應試者或給編修檢討之銜或邀舉人副榜之賜賞  
賚從優用彰人瑞而一有字句乖謬踪跡可疑者則斥革之  
無少貸故士皆績學勵行弗敢怠荒則選舉之所以正也宗  
室會試 欽命試題先令揭曉超登虎榜聯步蓬瀛則宗支  
之所以盛也表章詩書六藝之文抑遠荒誕無稽之說水滸  
西廂繙譯成書者 下令禁之以正人心以端學術而 經  
筵則 聖蘊淵深 御集則天文炳煥俾四方志學之士去  
闇昧而耀乎光明則文教之所以興也皂裔冒考罰及袒庇  
之官番役子孫已仕者不予超遷未仕者毋膺爵秩則流品  
於是乎分焉賢良等祠服蟒袍補褂以將祀事而勿用朝服  
因使編入會典著爲成式則典禮於是乎端焉停止各旗扣  
餉而諭以撙節愛養之道崇節儉也和闐獲玉冀荷渥恩而

聖德精純不邇不殖所寶惟在時和年豐民安物阜珠玉  
金銀不使呈進却貢獻也大吏勤慎者恤其後昆元老歸田  
者在籍食俸則破格之殊恩也編纂實錄者給以優敘會  
試首選者學習如前則曲成之大德也廓喀入貢念彼髫齡  
農耐請封亟頒恩諭斯柔遠之政行焉回民市錢無須官爲  
經理口糧施放必使四色均勻斯綏邊之道裕焉乃若天  
威所震逋寇皆誅捷報交馳三省寧謐露布於歲除之後聞  
喜於秋狩之前際北郊而勝仗頻書近南至而鴻勳載奏  
或臨陣而生擒或交鋒而殄殪或倒懸於崖樹之前或沒溺  
於湍波之內冒雪而剪鯨鯢乘夜而除梟獍始則零星而奔  
散終乃計日而廓清譬若烈火之燎鴻毛迅風之掃隕籜也  
而且靖雷夷之寇息臺海之波蕩會匪於博羅之境除邪逆

於宿州之城凡茲武烈之有成悉本 睿謨之預定而又頒  
賞臣工廣敷恩澤嘉其襄贊之謀敘其析衝之績採其防堵  
之微勞善其糧儲之早預封伯封侯授官授祿遺顯號於後  
世傳渥澤於子孫德既崇矣功既劭矣而猶 行健法 天  
孜孜罔懈瞻星閱摺問夜披衣召見羣臣權衡庶務緬 祖  
宗締造之勤紹 神聖相傳之緒雖當保大定功之日不忘  
習勞肄武之心信乎我 皇上體元則大爲平章百姓協和  
萬邦之本宜乎聲教布濩盈溢天區也 等班次豹尾獲遂  
管窺謹就一歲中 詔諭政令典章法度繫日繫月記 動  
記 言庶天下萬世知 聖天子稟欽命之度致巍煥之功  
相與揚頌鼓舞測高深於萬一云爾